

M096: Münchner Glauben und Beichte (A)

- 1a,1 sine fide impossibile est
 1a,2 placere deo uns saget diu heilige schrift daz daz
 1a,3 unmügelich sî daz ieman den almehtigen gote wole
 1a,4 müge gevallen âne den rechten gelouben . unde âne die heiligen
 1a,5 bîht unde âne den heiligen paternoster vone diu
 1a,6 manet hiute unsern hêrren daz er [iu] verlihe rehtes gelouben unde
 1a,7 wârer riuwe . unde sprechet [in] ime ze lobe unde ze êren unde
 1a,8 sîner trûtmuoter sanctae Mariae ze lobe und ze êren und
 1a,9 allen gotes heiligen unde . iu ze trôste unde ze genâden und
 1a,10 nemet hiute dâr inne . daz iuch unser hêrre überhebe unrehtes
 1a,11 tôdes unde gâhes tôdes . unde iuch behüete vore
 1a,12 houbethaftigen sünden . und vore werltlichen schanden .
 1a,13 und daz iu der heilige gotes lîchname werden müeze
 1a,14 ane iuwern jungesten zîten unde daz er alle ungenâde
 1a,15 understê . diu in der heiligen kristenheit sî und daz
 1a,16 [er] hiute helfelich sî allen iuwern vordern sêlen unde allen
 1a,17 geloubigen sêlen . nû sprechet nâch mir . fides catholica .
 1a,18 ich widersage deme tiuvel . mînen lîp unde mîne sêle
 1a,19 ich wil ane in niht gelouben . ich ne sol ane in niht gelouben
 1a,20 ich geloube ane einen got vater almehtigen der dâ schepfære
 1a,21 ist hime[l]es und der erde unde aller geschepfede
 1a,22 [ich] geloube ane sînen einborenen sun unsern hêrren Jesum
 1a,23 Christum geboren unde gemartert . ich geloube ane den heiligen
 1a,24 geist . ich geloube daz die drîe namen der vater
 1a,25 unde der sun und der heilige geist ein wârer got ist
 1a,26 der dâr ie was und iemer ist âne aneenge und âne

 1b,1 [ende] ich geloube daz [der] selbe [gotes] sun . gekündet [ward]
 1b,2 von dem heiligen engel sancte Gabriele unserre vrouwen
 1b,3 sanctae Mariae . ich geloube daz [er] entvungen wart vone
 1b,4 dem heiligen geiste daz er geboren wart vone mîner
 1b,5 vrouwen sente Marien . der êwigen megede ich geloube
 1b,6 daz er nâch sîner heiligen gebürte hier in erde wonete
 1b,7 driu unde drîzic jâr . unde mêre unde geloube daz er
 1b,8 innen der vrist getoufet wart . vone sancto Johanne
 1b,9 unde geloube daz er vastete vierzic tage âne underlâz .
 1b,10 ich geloube daz er gevangen wart vone den juden
 1b,11 daz er gemartert wart ane deme heiligen kriuze . daz

- 1b,12 er dâr an verschiet . ane der mennischheit [niht] ane der
 1b,13 goteheit . ich geloube . daz sîn heiligiû sêle hin ze helle
 1b,14 vuor mit der goteheit und die brach und dâ ûz nam
 1b,15 die sînen willen hêten getân ich geloube daz er erstuont
 1b,16 an deme dritten tage heiliger got und wârer mennische
 1b,17 ich geloube daz er nâch sîner heiligen urstende hier [in]
 1b,18 erde wonete vierzic tage und daz er ane deme vierzigesten
 1b,19 tage hin ze himel vuor . ze gesiht sîner trute
 1b,20 die des wert wâren daz si sîne himelvar gesâhen
 1b,21 ich geloube daz er dâ sitzet [ze] der zeswen sînes vateres
 1b,22 ime ebenhêr und ebengewaltic . küninc aller
 1b,23 künige troestære aller süntære ich geloube in dannen
 1b,24 kûmftigen ane deme jungesten tage ze erteilen
 1b,25 über lebentige und über tôten . eineme iegeslîchen
 1b,26 mennischen al nâch sîneme werken und nâch
- 2a,1 [dem] almehtigen gote [mîner] [vrouwen] [sente] [Marien]
 2a,2 der himelischen küniginne . sente Michaelē und allen
 2a,3 gotes engelen . sente Johanni und allen gotes wîssagen .
 2a,4 sente Petro und allen gotes boten . sente Georgio
 2a,5 und allen gotes marteræren . sancto Nicolao und
 2a,6 allen gotes bihtigæren . sente Mariē Magdalenae unde
 2a,7 sanctae Margaretæ unde allen gotes meiden . disen genædigen
 2a,8 heiligen und allen gotes heiligen . unde dir
 2a,9 priester aller mîner sünden die ich ie gevrûmete . sît
 2a,10 [ich] allrêreste sünden mohte . unze ane dise wîle . swie ich
 2a,11 gesündet hân . wizzente oder unwizzende . tages oder
 2a,12 nahtes . mit mir selben oder mit andern mennischen .
 2a,13 mit willen . mit worten mit . werken oder mit boesen
 2a,14 gedanken . hêrre daz riuwet mich . hêrre Krist
 2a,15 gotes sun ist dechein sünde die ich vermiten hân –[...]
- 2b,1 [noh] [teiding] [mînes] [lîbes] [sô] lange daz ich gebüeze
 2b,2 mîn unreht daz ich wider dich hân getân unde wider
 2b,3 mîn arme sêle mit deme selben lîbe dâ ich ez mite
 2b,4 gevrûmet hân . des ruoche mich ze gewerene alsô gewaltiger
 2b,5 hêrre dû dâr lebest unde rîchesenest vone êwen unde
 2b,6 ze êwen âmen misereatur vestri omnipotens deus
 2b,7 et dimittat vobis omnia peccata vestra liberet vos
 2b,8 deus ap omni malo conservet et confirmet vos in omni
 2b,9 opere bono et perducatur vos Christus filius dei sine macula
 2b,10 cum gaudio in vitam aeternam amen indulgentiam
 2b,11 et remissionem omnium peccatorum vestrorum spatium
 2b,12 verae et fructuosae [poenitentiae] cor semper poenitens et felicem
 2b,13 consummationem per gratiam sancti spiritus tribuere dignetur
 2b,14 vos omnipotens et misericors dominus . amen . kyrie eleyson
 2b,15 Christe eleyson kyrieleyson pater noster hêrre got vater unser –[...]